



# سیرد هند



حلمت بجوزي بياخدي من ايدي وبيشاور علي حته تحت الكنبه في بيتنا، وبيحاول يقنعني إن تحتها في أرض ممكن أزرع فيها. ببص علي الارض لقيتها صخر وقتله الارض ده بور مش حتطلع حاجة. فضل يزقني لتحت ويقول جربي بس وأنا أقوله صدقني الأرض دي بور مش حينفع أزرع فيها حاجة مافيش منها أمل صدقني. فتحت عيني في بيتي على سريري وكنت لسه حاسه بالتقل على ضهري ورقبتي . حسيت بظهري واجعني كأنه مكانش حلم ... التقل ده مش حلم.

اتجوزت قبل ما أكمل ثانوي. كنت طفلة ١٧ سنة، معرفش الصح من الغلط. بعد ما اتجوزت وقعدت معاه ١٠ سنين، حسيت إنه لا دا هو جوزي اللي أنا عوزاه، ولا دي الحياة اللي أنا عوزاها، لحد ما تعبت ورحت طلبت من جوزي الرجوع لمصر. ورده كان: "لأ احنا بنعمل فلوس كويسة هنا في السعودية". ففكرت أرجع مصر بحجة إن أنا مريضة. شلت المرارة هنا في مصر وأنا عندي ٢٨ سنة، وكان معايا ٣ عيال. فلما بقيت في وسط أهلي حسيت إن أنا قوية وقولت مش راجعة السعودية تاني. ف الكل قال: "يا بنتي و جوزك!" قولت لهم "والله مش هرجع السعودية. واستحالة هكمل برا تاني".

جارتني جت تعزمني على خطوبة بنتها اللي كانت في تانية اعدادي! أنا طول الوقت في الخطوبة دي عمالة أعيط. عايزة أقول لها انتي بترميها، يعني عيلة صغيرة تفهم إيه في الجواز دي! قلت لها "طب ممكن أطلب منك طلب؟ متجوزيش بنتك دلوقت". قالت لي: "يا أبله دول خمسة على قلبي، ده أنا ما حصدق أطلع منهم واحدة". قلت لها "والله العظيم لو هتموت من الجوع عندك أحسن ما تموت من الجوع مع حد هي مش هتقبله أصلا لما تكبر"، وبدأت أكلمهم.. "ياجماعة يوم الجمعة بعد ما تخلصوا شغلخوا، أنا عاملة في البيت قعدة، تعالوا اقعدوا معايا". وقعدت أحكي لهم انه ما تطهروش البنات، الطهارة دي أصلا عادة ضارة جدا ، هتؤذي البنات مش حتفيدا زي ما انتوا متخيلين إن هي عفة ونضافة والحوارات دي خالص. وبدأت مجموعة منهم تسمعني.

كان في بنتين رايعين يختنوهن. وهم رايعين الدكتور وأنا وراهم أجري. قتلهم "طب تعالوا نتكلم سوا. البنات خايفة... أحسن واحدة منهم تنزف من الخوف". المهم أخذتهم على جنب كده ووقفنا في محل واحدة بتبيع هدم. قلت لهم:

"طب ايه المشكلة ان انتوا تسيبوها زي ما ربنا خلقها؟"

"لا يا أبله انتي عاوزة بناتنا لما يكبروا يمشوا في البطال!"

قلت لهم: "بصوا طب في دكتورة صديقتي، كانت راجعة من برة وهي كانت زميلتي أصلا في ثانوي. ومن ساعة ما اتجوزنا و كل واحد فينا راح لحاله من ساعتها ما شفناش بعض. جيت قابلتها مرة في المترو، عرفنا بعض و سلمنا، والمهم انتي فين، قالت لي أنا في مركز بتاع تنظيم أسرة . بدأت أنا وهي ننفذ ندوات للسيدات، نعرفهم ان الختان ده مش الحاجة اللي هتغف بنتك ولا الكلام ده كله. بدأنا نجتمع البنات اللي خلاص هيتجوزوا مثلا وهيخلفوا، أو اللي معاهم بنات صغيرين وقربوا يعملوا لهم الموضوع ده. لأن احنا عندنا في المنطقة البنات من تانية ابتدائي لحد رابعة يبجي فصل الصيف ويأخدوهم طابور ويروحوا يطهروهم عند واحدة دكتورة. فأنا عرفتها الموضوع ده وبدأنا نروح نزور الستات اللي معاهم ولاد قربوا يعملوا الموضوع ده ونوعيمهم. خليت الدكتورة تقنع عدد كبير منهم، بس كنا بنلاقي حد يصدنا، والناس بتضايقنا. راحت الدكتورة صديقتي قالت لي: "أنا

كان نفسي أكمل معاكي بس الناس هنا دماغها صعبة".  
سافرت برا مصر وأنا عمالة أفكر؛ طب أنا هفضل كده! هسيب الناس دي تدمر نفسها وعيالها؟!  
رحت بقول لقريبتني في مرة قاعدين سوا: "ما تيجي نعمل جمعية؟"  
قالت لي "هو حد فينا فاضي؟ جمعية ايه اللي هنعملها!"  
قلت لها "لا أنا اللي همسكها، بس أنا عاوزة أعضاء معايا. ناس أثق فيهم."  
وفعلا جمعنا ٥ بطايق بتاعتنا ورحت عاملة ورق الجمعية... دا كان بعد الثورة بشوية.  
كان في مجموعة دينية مسيسة جولي الأول بالحسنى، قالوا لي: "هنحط صورتك وهتبقى معنا في  
"الحزب" وناخد لك مكان ٥ أدوار وهنأسسهولك وتبقي تبعنا."  
وأنا أصلا اكمني كنت عايشة في السعودية كنت لابسة نقاب، بس أنا النقاب على وشي مش على  
عقلي.

وبقى يجولي شيوخ وستات منتقبات يقولوا لي:

طب انتي ايه بتعملي كده؟

طب انتي مصلحتك ايه؟

انتى مين مديكي فلوس عشان تعملي فينا كده؟

قلت لهم: "أنا محدش مديني فلوس."

أنا مش عايزة أقول لها إن دي تجربة وأنا عشت مأساة، بس قولت لهم احنا عارفين إن الحاجة دي  
ضارة، ازاي هنسيب الناس تعملها؟  
قالوا: لا بس حرام عليكى. الستات اللي انتى منعتهنم دول الدكتور عامل لهم تخفيض يجيبوا بنتين  
والتالثة ببلاش.

فجأة وأنا مروحة كانت عربية هد تخبطني. بس أنا الحمد لله كنت رشيقة نطيت محصلش حاجة.  
بس عرفنا بقى ان ده كان حد مسلط "اخبطوها بعربية وهي ماشية." عايزين يخلصوا من البومة اللي  
عمالة تأدن في وذن الستات.

لحد ما حصلت حادثة شهيرة في ٢٠١٢، بنت كانت طالعة رابعة ابتدائي راحت عند الدكتور ونزفت  
كمية هائلة من الدم، وصلت لمرحلة الموت. وقسم الشرطة جه وعمل معاينة لقى العيادة مليانة دم  
ومبهدة خالص. أبو البنت اشتكى لكن الدكتور متعاقبش. كان ليه حد في وزارة الصحة وراحوا خدوا  
أبو البنت و اتصالحوا، وقالوا عادي ما دام البنت لسة عايشة... البنت لحد دلوقتي ضعفانة جدا  
وقطفوها يا عيني.

أنا مريت بتجربة شخصية، ومش عاوزة غيري يتعرض لها. وقعدت أعمل ده بكل الوسائل اللي  
عندي. لو مش هعرف اتكلم مع الستات بالطريقة اللي هم عاوزينها، هجيب لهم حد يقول لهم الكلام  
ده. جبت شيوخ وجبت دكاترة عشان يقنعوا السيدات ان الختان عادة ضارة... حاولت على قد ما  
أقدر.

حاليا مفيش دكاترة في المنطقة بتعمل ده لأن احنا واقفين بالمرصاد. في الموسم بتاع الختان ده  
بنكرس يمكن كل أسبوع ندوة، وأجيب ناس يتكلموا مع البنات في المدارس وعرفناهم نجدة الطفل،  
وطريقة التصرف لو في أي حد فيهم اتعرض لحاجة.

في منطقة مش قادرة اقتحمها وهي جواز البنات في الجزيرة. الجزيرة دي أهلها منعزلين جوا المياه، حتى في الجواز مبيكتبوش بـ مأذون، ده جواز كده زي زمان بس يعزموا أهل المنطقة ويفرحوا والبنات تتجوز وخلص. البنات بتكون مواليده ٢٠٠٣ ومعاها بيبي عنده سنة ونص!

أنا عاوزة أجيلهم من حنة قانونية. دلوقتي هي مش معاها وثيقة زواج والبيبي ده اتولد، هتكتبوه فين، هتسجلوه؟ يعني انتي طالما بنتك لسه مكملتش سن الجواز يبقى مش هيطلع لها قسيمة جواز. المأذون مش هيعرف يطلعها لو اتنطط حتى. العيلة دي بعد ١٠ سنين بالطبط لا هتبقى عاوزة وجوزها ولا ولادها. هتبقى اتغيرت ومفاهيمها اختلفت.

في المنطقة هنا في مشاكل أسرية، جاية من ان الراجل قاعد في البيت ومفيش لا شغلة ولا مشغلة. والستات ينزلوا يشتغلوا ويمسحوا في البيوت والرجالة تضرب فيها ليل نهار، وياخدوا منهم الفلوس عشان يجيبوا سجاير... بيأنتخوا في البيت والست تشتغل!

فبدأنا نعمل لهم حرف يدوية بيحوا يتدربوا عندنا. وبعد ما يخلصوا نقعد نحكي؛ عملتوا ايه؟ طب انتي لما روحتي وانتي واخدا له لحمه مثلا، اشترتها بعد ما اشتغلتني، عمل ايه؟ منهم اللي ترد تقول: "والله يا أبله طفح وضربني. والله يا أبله شد شعري وأنا بطبخ وحطهولي في بقي."

الرجالة هنا كلها بتستعطي مخدرات. والستات يا عيني لا حول لها ولا قوة. وكمان لو عملوا تحليل فيروسات هيلاقوا عندهم بلاوي زرقه. يعني أنا حتى لما واحدة تيجي تشتغل في بيت تقولي دا صاحب البيت اغتصبها ونام معاها. دا بيحصل في أبراج عالية بتبص على النيل. بياخدوا الخدم من المنطقة هنا. لازم اللي بياخدوها يغتصبوها وينامو معاها وبيتزوها. توصل الواحدة لمرحلة ان يتعمل كل ده فيها عشان خاطر لقمة العيش. في أوقات نقفل علينا الجمعية هنا وبيقوا ٥ - ٦ سنات عمالين يعيطوا وحزنانيين. فأروح مشغلة لهم أغاني "ياللا نرقص يا بنات"، ما أنا جه عليا وقت مريت بالظروف دي وملفتش حد للاسف لا شغلي تسجيل يقولي تعالي ارقصي، ولا لقيت حد يطبطب عليا في الغربية وأنا لوحدي وبطولي.

الستات بيصعبوا عليا اوي و يبقى حاسة ان هم عملوا ايه عشان يتعمل فيهم كل ده! نفسي أعمل حاجة خاصة بالمرأة وبالقوق الجنسية. جلسات أو ندوات بشكل مصغر لمجموعة من السيدات اللي حاصل معاهم مشاكل. والكلام اللي احنا بنقله هيكون أكثر سرية. ونحاول نساعدهم.

مجموعة منهم لما قعدنا نتكلم عن هل بتاخدوا حقكوا وانتوا نايمين؟ في ناس كتير ميعرفوش ان ليهم حق ياخدوه... ان هي تنبسط. لو الست واخدة حقها في السرير مع جوزها، أعتقد كانت الدنيا هتهون شوية. لكن لا واخدة حقي في الدنيا ولا مبسوطه. وبعدين احنا المجتمعات الفقيرة دي الحاجة اللي بتعمل سعادة العلاقة الزوجية. فان هي مش عارفة تنبسط بيها، مش عارفة تاخدها، دي بتحز اوي في نفس الواحدة يعني. طب أروح فين وأجي منين! يعني معلى يبقى مبهلها وضاربها، وييجي بالليل يروح ينام معاها!

مبحطش حاجة في دماغي غير لما تتعمل. يعني مثلا في مقلب زبالة. مقلب الزبالة ده أنا بعون الله قبل ما ييجي نص ٢٠١٩ هكون عملاه جنينة. المكان ده عبارة عن دايرة ينفع تتعمل ميدان. لو اتعملت ميدان هتحيي المكان كويس جدا. عاوزة أعمله جنينة عشان الناس الغلابة تقعد في مكان حلو.

دي واحدة قالت لي إن بنتها خطوبتها اتفسخت عشان مقلب الزبالة ده!  
بعد ما عملوا الخطوبة وجاي العريس وجايب أهله، وهو داخل في مقلب زبالة كبير، فقال لها "ايه ده! انتي مخلياني أجيب أبويا مدير المدرسة (هو من حطة برة المنطقة) ييجوا يخشوا المكان ده؟" بنتها اتفسخت خطوبتها بعد أسبوع. الناس غلابة ومن حقها تشوف منظر جمالي.

أنا زي أي أم بتمنى ولادي يتعلموا كويس - بالذات البنات - وياخدوا فرص حلوة. يسافروا برة يحضروا حاجات تخليهم أكثر ثقة في نفسهم، وميخافوش من حاجة. واللي أنا عملته في طفولتهم هو اني حبيتهم واحتويتهم ومعملتش أي حاجة من اللي اتعملت فيا. مش معقولة أخليهم يملوا بالتجارب السيئة اللي مريت بيها. وحاولت أعوضهم عن حاجات كتير مخدوهاش زي ما هم عايزين. الصبيان بحاول أقرب منهم، وبحاول أحتويهم على قد ما أقدر.

دلوقتي مركزة مع بنتي اللي في ثانوية عامة عشان تجيب مجموع وتدخل كلية تسهل لها الشغل بعدين. وبشجعها انها تشتغل. وموضوع الجواز والارتباط بقولها زي ما يجي، ان شا الله يجي وانتي عندك أربعين سنة، المهم انك تعيشي حياتك صح. الحياة مش بس جواز وارتباط، الحياة نجاح في الشغل ونجاح في علاقات كويسة في المجتمع المحيط بيها. بتمنى انها تسافر برة حتي لو هي بتدرس طالما فرصة كويسة. بتمنى تخرج من القالب التقليدي للبنات، مش هتدخل طالما هي راضية.

أما بنتي الصغيرة فهي موهوبة. بتمنى اني أعرف اخليها تستثمر مواهبها. أنا استحملت حياتي عشان خاطرهم وعشان يعيشوا في جو أكثر ألفة ومحبة، ويروحوا لحتت كويسة في التعليم، بالذات البنات. نفسي أتطلق. نفسي أموت وأنا منفصلة. مش عاوزة أموت وأنا على ذمته. الموضوع ده عامل لي غصة في قلبي. أنا حاسة اني لو انفصلت هبقى أخذت حقي. دي أمنيتي الشخصية، بطلبها من ربنا دايمًا.

كنت متخيلة انه لما يرجع يعيش في مصر الدنيا هتختلف. مفيش تفاهم بيننا. فرق بيني وبينه ١٠ سنين. أنا عندي ٤٠ سنة وهو عنده ٥٠ سنة دلوقتي. عمرنا ما أكلنا مع بعض ولا شربنا، يعني طول الوقت أنا هنا في الشغل، بروح البيت أخش أوضتي. لو أنا عايزة أكل هأكل، لو مش عاوزة هنام وهو مبيكلمنيش.. طب ايه لزوم الحياة دي! الواحد يا يعيش صح يا ما يعيشهاش.